

**Sastanak NAC+4 NATO samit
Čikago, 21. maja 2012. godine.
Sjedinjene Američke Države**

**Govor N.J.E. dr Zlatka Lagumdžije, zamjenika predsjedavajućeg Vijeća
ministara i ministra vanjskih poslova Bosne i Hercegovine na Sastanku
NAC+4 NATO samita**

Gospodine generalni sekretare, dame i gospodo,

Dozvolite mi da se na početku pridružim ostalim kolegama i zahvalim našem američkom domaćinu, gospođi sekretaru i ekscelencijama, na učešću u ovom samitu.

Želio bih da izrazim zadovoljstvo zbog našeg učešća na današnjem sastanku NAC+4, koji tumačimo kao veoma značajnu poruku NATO saveza i njegovih zemalja članica o punoj podršci Bosni i Hercegovini na putu ka punopravnom članstvu u NATO-u. Nakon sporazuma postignutog između političkih stranaka koje čine većinu u Parlamentarnoj skupštini i odluke Vijeća ministara BiH o rješavanju pitanja vojne imovine, koja je donesena 9. marta, Predsjedništvo BiH donijelo je 21. aprila Odluku o veličini, strukturi i lokacijama vojne imovine Oružanih snaga Bosne i Hercegovine. Tokom sljedećih dana očekuje se da će Parlamentarna skupština Bosne i Hercegovine također donijeti odluku o vojnoj imovini i da će sporazum o ovom pitanju biti potpisan između Vijeća ministara Bosne i Hercegovine i vlada dvaju entiteta. Na taj način biće potpuno uspostavljen zakonodavni okvir za rješavanje tog pitanja, te će otpočeti proces knjiženja vojne imovine.

Koristim ovu priliku da još jednom ponovim opredjeljenje Bosne i Hercegovine za punopravno članstvo u NATO-u, koje vidimo kao najbolju garanciju za mir i stabilnost, ne samo u Bosni i Hercegovini, već i u čitavom regionu Jugoistočne Evrope.

Bosna i Hercegovina je u potpunosti svjesna da punopravno članstvo u NATO-u ni u kom slučaju ne znači samo korištenje prednosti koje pruža članstvo, već da ulazak u NATO pretpostavlja i našu obavezu da doprinesimo realizaciji NATO-ovih aktivnosti i ciljeva.

Bosna i Hercegovina već nekoliko godina učestvuje u NATO operacijama, potvrđujući na taj konkretnu spremnost da postane aktivna i konstruktivna zemlja članica, učestvujući u misijama od Iraka do Afganistana.

Kao članica Vijeća sigurnosti Ujedinjenih naroda, tokom Arapskog proljeća Bosna i Hercegovina je pokušala u okviru svojih mogućnosti pružiti konstruktivan doprinos podršci međunarodne zajednice tim procesima. Unatoč znatnim ekonomskim interesima u Libiji, Bosna i Hercegovina je bez oklijevanja podržala usvajanje Rezolucije u Vijeću sigurnosti, što je otvorilo vrata za vojne intervencije u toj zemlji. Osjećali smo da je naša dužnost zaštititi civilno stanovništvo i podržati njihove legitimne zahtjeve za slobodom i spremni smo biti dio rješenja u Siriji, u slučaju da to bude potrebno.

Gospodine generalni sekretare, dame i gospodo,

Naravno, u potpunosti smo svjesni i da brzina procesa našeg približavanja NATO-u u najvećoj mjeri zavisi od nas samih, odnosno od naše sposobnosti da ispunimo postavljene uvjete i usvojimo standarde NATO-a, radeći to kroz naše institucije.

Bosna i Hercegovina je u potpunosti shvatila poruku iz Brisela, da put prema NATO-u, kao i EU članstvu prolazi kroz regionalnu saradnju, posebno saradnju sa našim susjedima. BiH kroz svoje bilateralne i multilateralne aktivnosti svakodnevno radi na daljnjem poboljšanju i produbljivanju saradnje sa svim našim susjedima. Naši odnosi sa susjedima su jedan od najviših prioriteta vanjske politike Bosne i Hercegovine.

BiH u potpunosti podržava punu evroatlantsku integraciju našeg regiona u što kraćem roku. Smatramo da je to najbolji način za osiguranje trajne stabilnosti i prosperiteta u Jugoistočnoj Evropi. Na taj način čitav naš region bi konačno mogao da zatvori jednu od najtežih stranica u svojoj historiji, te da se okrene budućnosti. Primjer Hrvatske pokazuje da su evroatlantske integracije našeg regiona realnost.

BiH od 1. januara 2012. godine predsjedava Američko-jadranskom poveljom. U tom smislu, bit će mi čast biti domaćin A5 sastanka ministara vanjskih poslova u Sarajevu, 19. juna.

U našem programu predsjedavanja A5 sastankom, poseban akcent je stavljen na konkretnu saradnju država članica upravo u domenima odbrane i sigurnosti, sa ciljem uspostave sinergije naših zemalja po tim pitanjima.

Kao zemlja aspirant za punopravno članstvo u NATO-u i učesnik u ISAF misiji, Bosna i Hercegovina sa velikom pažnjom prati razvoj situacije u Afganistanu. BiH je opredijeljena da, u okviru svojih mogućnosti, nastavi i u narednom periodu sa svojom podrškom uspostavljanju mira i stabilnosti u Afganistanu.

Gospodine generalni sekretare, dame i gospodo,

Bosne i Hercegovina je u proteklom periodu prešla dug put. Od zemlje korisnice međunarodne sigurnosne pomoći do zemlje koja je na pragu punopravnog članstva u NATO-u i zemlje koja daje svoj konstruktivan doprinos uspostavi mira i stabilnosti u svijetu. Prije samo šesnaest godina, zemlje članice NATO-a slale su svoje sinove u mirovnu misiju u BiH. Danas, BiH šalje svoje vojnike u mirovne misije širom svijeta, zajedno sa kolegama iz zemalja članica NATO-a.

Nećemo vas pitati za nešto što nam ne treba. Ali, tražit ćemo od vas da nas podržite u našim zajedničkim potrebama. NATO je alat koji nam treba da transformiramo našu zemlju u samoodrživu i prosperitetnu zemlju, u kojoj će svaki pojedinac biti zaštićen i promoviran kao dio zajedničkog, a ne podijeljenog društva, i da bude kao Čikago, koji je ponosan na svoje različitosti.

Zahvaljujući vodstvu velikog američkog predsjednika i lidera NATO saveza u 1995. godini, rat u Bosni i Hercegovini je zaustavljen, što nam je dalo priliku da započnemo proces izgradnje države koji bi nas doveo do institucionaliziranog mira i prosperiteta.

Danas nam treba takav tip vodstva među nama, na lokalnoj razini, kao i od strane međunarodne zajednice koja je prisutna na ovom sastanku, kako bi postigli svoj zadatak. Ja sam siguran da ga imamo.

Put koji smo prošli nije bio lak, niti je završen. Znamo da ispred nas stoje još brojni izazovi. Međutim, uvjeren sam da ćemo uz vašu podršku te izazove uspješno riješiti za dobrobit svih naših građana.

Pozivam vas da svi zajedno budemo u Sarajevu fizički i logički do 2014. godine.

2014. bi trebala biti višestruko simbolično i suštinski bitna godina za sve nas ovdje.

2014. kao godina tačke infleksije, kada ulazimo u novi, sigurniji, razvojni ciklus.

2014. godina kao godina okončanja misije u Afganistanu.

2014. kao godina NATO proširenja.

2014. kao godina stvarnog početka 21. vijeka.

2014. kao godina stvarnog početka 21. vijeka, koje se tako može nazvati samo kada pokaže da je drugačije od 20. vijeka, makar u Evropi.

Bosna i Hercegovina, kao i Sarajevo, će biti dokaz da li je 2014. godina zaista takva kakva se danas i ovdje oslikala u NATO viziji.

To zahtijeva liderstvo za koje vjerujem da se okupilo danas u Čikagu.

Zahvaljujem se, zbog toga, svima vama ovdje prisutnima kao ljudima koji nas podržavaju, promoviraju i predstavljaju naše advokate u evroatlantskim strukturama.

Hvala.